

DISSERTATIO INAUGURALIS MEDICA
DE
FEBRE TERTIANA
INTERMITTENTE SOPOROSA
UT PLURIMUM FUNESTA, FELICITER
TAMEN CURANDA.

HANC
DEO CLEMENTER IUVANTE
DOCTORE UNIVERSITATIS MAGNIFICENTISSIMO
SERENISSIMO PRINCIPE AC DOMINO,
DOMINO
D. CAROLO LUDOVICO,
COMITE PALATINO RHENI, DUCE BAVARIÆ,
COMITE VELDENTIÆ & SPONHEMII rel. rel.
PRÆSIDE

VIRO
EXCELLENTISSIMO ATQUE EXPERIENTISSIMO DOMINO,
DOMINO
GEORG. FRIDER. SIGWART,
PHIL. MED. ET CHIR. D. HUIUSQUE ET ANAT. P. P. O.
MED. AUL. VIRTEMB. FAC. MED. SEN. ET. p. t. DECANO,
PRAECEPTORE SUO ET PATRONO AETATEM COLENDO,
PRO
INSEQUENDIS SUMMIS IN MEDICINA HONORIBUS

A. D. Oct. 1759.

H. L. Q. C.

DEFENDET

AUCTOR

H. GOTTLIEB MOERICKE, *Neostadiensis ad Cocharam.*

TVBINGÆ LITTERIS COTTAIANIS.

THE UNIVERSITY OF THE MEDICAL

REPRESENTATIVE

OF THE MEDICAL

OF THE MEDICAL

OF THE MEDICAL

OF THE MEDICAL

OF THE MEDICAL

OF THE MEDICAL

OF THE MEDICAL

OF THE MEDICAL

OF THE MEDICAL

OF THE MEDICAL



§. I.



Morbos inter, qui genus humanum misere excruciant, unus est ceteris & pertinacior, & frequentior. Nulli is parcit ætati, nulli sexui, nulli temperamento. Aequo pulsat pede pauperum tabernas, regumque tures. Nec est regio, nec tempestas, quæ ab illius furore immunitatem sibi polliceri possit. Dum alii morbi non nisi partem aliquam corporis humani infestant, hic totum, quantum quantum est, corpus pervadit torquetque: unde merito a Medicis universalis morbi nomen reportavit. *Febrem* hac adumbratione significari, facile intelligas. At quænam hujus *essentia*? Difficillimam esse ad hoc responsionem, passim peritissimi fatentur pathologi. Unde etiam tam diversæ diversorum Auctorum de febre definitiones. Equidem, cum hæc ita se habeant, ab æquis rerum æstimatoribus, caveam meam intuentibus, facile veniam me impetraturum esse confido, si, missa *scrupulosa febris definitione*, ea, quæ Illustris JOH. de GORTER de illa memoriæ prodidit, hoc loco repetere



tere maluero. Ita autem ille (a): *Multitudo causarum & symptomatum summam in definienda ejus (febris) natura præbuit difficultatem. Quæ enim passim in uno inveniuntur genere febrium, quibus possumus præsentiam febris cognoscere, in alio autem ne quidem conspiciuntur. In omnibus vero febribus aliqua observatur ægritudo, & nisi febris sit anomala, incipit cum horrore & frigore; dein excitatur calor æstuans cum corporis siccitate; demum erumpit sudor, quo febris terminatur: in frigore pulsus exilior magisque obscurus, in calore plenior, frequentior, durior, in sudore iterum remissior, donec, febre finita, in naturalem ordinem redigatur.*

§. II.

Quum non omnes febres unam eandemque causam agnoscant, prætereaque ratione indolis, durationis sive decursus, subjectorum, quæ aggrediuntur, locorum, in quibus sæviunt, ordinis, quem servant, anni temporum, typi, aliorumque accidentium, quam maxime inter se differant, variæ inde natæ sunt divisiones, quas singulas speciatim recensere, nimis longum foret. Missis igitur reliquis, id tantum adnotare liceat, febres ratione typi in continentes, continuas, & intermittentes dividi. Hinc GALENUS (b): Συνεχεῖς ὀνομάζουσιν, ὅτι μὴτ' εἰς ἀπυρεξίαν λήγασιν, καὶ διαλειπόμεναι τοῖς κατὰ μέρος παροξυσμοῖς. Εἰσὲ γάρ ὄντως ἐν τῇ μέσῳ τῶν συνοχῶν, καὶ τῶν εἰς ἀπυρεξίαν πεινομένων.

§. III.

Continentes febres vocantur, quæ a primo insultus tempore ad finem usque eadem sæviunt vehementia. Tales sunt febris ephemera

(a) Comp. med. in usus exercitationis domesticæ digesto. tract. LII. §. II. p. 266.

(b) de temporibus morbi.



mera simplex, & plurium dierum, synocha simplex, cet. Continuae audiunt, quæ, caloris sui intuitu, post singulos quidem paroxysmos a sua remittunt violentia; ita tamen, ut febris non plane cesset, & per intervalla exacerbetur. Hujus generis sunt *continuae quotidiana, tertiana, quartana, catarrhales, rel. Intermittentes* appellantur, quæ per intervalla, vel majora, vel minora, ægrum aggrediuntur, postque singulos superatos paroxysmos, & frigoris, & caloris respectu intermittunt, plenariamque inter duos quosque paroxysmos ἀνυπερβαίν conjunctam habent, ita, ut ægrotus hoc tempore intercalari, ceteris paribus, bene valere videatur. Referuntur huc *febres intermittentes quotidiana, tertiana, quartana simplices, & duplices, cet.*

§. IV.

Intermittentes febres, pro typi, quem servant, diversitate, in quotidianas, tertianas, quartanas, quintanas, sextanas, septimanas, rel. (c) immo annuas (d), dividi solent. Has inter, quæ quartanarium typum excedunt, teste experientia, rarissimæ, quotidianæ & quartanæ frequentiores, tertianæ denique frequentissimæ sunt.

§. V.

Febris, quæ alternis diebus ægrotum cum horrore, rigore, & subsequente anxio ardentique calore invadit, cumque sudore finitur, *tertiana intermittens* nominatur.

A 3

§. VI.

(c) SENNERTUS *de febribus* Lib. 2. Cap. 16. p. 489. ed. Witteb. 1619. Van SWIETEN *comment. in aphor. BOERH.* T. 2. p. 504. seq.

(d) Van SWIETEN l. c.



§. VI.

Appetitus prostratus, totius corporis, & in primis artuum, lassitudo, capitis dorſique dolor ut plurimum tenſivus, hypochondriorum inflatio, alvi ſegnities, *tertiana* mox ſubſecutura *prodromi* haud raro eſſe ſolent. Ipſe vero febrilis paroxyſmus ægrotos ante meridiem plerumque cum frigoris ſenſu, in primis minutis leviori, pandiculationibus, oſcitationibus, aggreditur. Facies, labia, ungues, pallent, mox liveſcunt. Horror & rigor, pededentim increſcentes, totum occupant corpus. Univerſa conſtringitur cutis, detumeſcunt vaſa, & diſparent. Oculi fiunt cavi, naſus redditur acutus. Corpus frigore concutitur tam graviter, ut dentibus etiam ſtrideant. Horro-
 rori huic tenſivus ac gravativus dolor circa primam dorſalem vertebram, & per dorſi longitudinem epigaſtrium verſus adſcendens, ſeſe aſſociat. Debilis, parvus, juſto celerior, ſæpius intermittens, micat pulſus. Inſignes oriuntur præcordiorum anxietates. Sæpiſſime linguam mucus quidam viſcidus obſidet, oſque amarus vexat ſapor. Immanis interdum ægrotos excruciat ſitis. Sequuntur, ſub primis potiſſimum paroxyſmis, nausea, inanis vomendi conatus, vel etiam actualis bilioſæ, & pituitosæ, nec numquam etiam viridis materiæ vomitio. Hujus loco in aliis diarrhoeæ obſervantur. Urina, quam hoc tempore, quod *exhorreſcentiæ tempus* SYDENHAMO (e) audit, emittunt ægri, plerumque pauca, vel plane non tincta, limpida atque pellucida eſt. *Stadium* hoc, ſi quidem legitima ſit *tertiana*, ultra horam non extenditur.

§. VII.

Horrorem excipit *alterum ſtadium*, quod *ebullitionis* adpellatur. Corpus, frigore antea rigidum, calore quaſi denuo per-
 fundi

(e) *tr. de febr. cap. 5. p. m. 77.*



fundi occipit. Vasa, antea collapsa, tumida nunc fiunt. Pulsus augetur, plenior, fortior, durior, celerior atque frequentior micat. Pallidus lividusque cutis & faciei color in floridiorum, rubicundiorum, mutatur. Oculi fiunt turgidi, rubicundi, fulgidi. Siccus corporis calor in aliis gradatim, in aliis præcipiti satis cursu augmenta capit, acer, mordax evadit. Pungens & pulsatilis cephalalgia, intensa sitis, ægros excruciant. Respiratio fit citatior, & aliena interdum loquuntur. Urina, cujus paulo majorem quantitatem frequentius hoc tempore emittunt, flammea, rubicunda, & saturata est, nullumque deponit sedimentum. Stadium hoc sex plerumque, vel octo horarum est.

§. VIII.

Exsuperato hoc stadio, tertium, quod *despumationis* vocant, incipit. Recensita (§ præced.) symptomata pededentim imminuuntur. Pulsus evadit mollior, micat lentius. Cutis laxatur, & madescit. Calor sensim mitescit, sudore corpus, in primis quidem paroxysmis leviori, in sequentibus autem largiori, perfunditur. Quo finito, omnia symptomata cessant, æger orthostadius fit, & interdum non, nisi de corporis lassitudine, & appetitus prostratione, queritur. Subsequente intercalari die, saturatior adhuc rubicundiorque, quam ebullitionis tempore, emittitur urina, postque morbi statum, roseum, biliosum, sedimentum deponit. Durant hæ induciæ per duas noctes, interjectumque his integrum diem, quibus transactis, nova denuo luditur tragœdia, ita tamen, ut paroxysmus plerumque anticipet, rarius postponat, & symptomatum vehementia ad quartum usque crescat, quo superato, criseos signa in urina apparere solent. In sequentibus paroxysmis, plerumque postponentibus, symptomata iterum pededentim imminuuntur,



untur, ægerque, transactis septem circuitibus (f), cum sanitate in gratiam redit. Quodsi ultra septem paroxysmos sese extendat, *chronica* adpellatur.

§. IX.

Causa proxima, ut febris in genere, ita etiam tertianæ intermittentis in specie, est velocior fluidi nervei, sanguinisque in nervorum cava cordisque vasa influxus, quem fortior & velocior hujus & arteriarum contractio, similisque, tum instantinus, tum progressivus, sanguinis motus sequitur, in vasa capillaria obstructa, vel quocunque modo læsa, reagens, circulum in iisdem promovens, & resolutionem, divisionem, coctionem, secretionem, & excretionem causæ morbificæ, vel translationem ejusdem ad alia loca, magis minusve nobilia, produciens.

§. X.

Causæ remote sunt I. Viscida atque acris, in primis viis, ventriculo, & intestino duodeno, hærens materia, quæ cum chylo ad sanguinem delata, simili eundem inficit vitiosa qualitate: unde non tantum, qui digestionem & *χυλοποιήσει* famulantur humores, saliva, liquor gastricus, utraque bilis, & succus pancreaticus, præternaturalem induunt crasim, ulteriorque materiæ morbificæ generationi ansam præbent, sed & sanguis, nimia spissitudine & acredine peccans, in arteriarum finibus tandem subsistit, spasmos excitat, sub quibus sanguis primo ad interiora urgetur, auctoque inde cordis & arteriarum motu, rursus versus corporis superficiem propellitur. II.

Ætas

(f) HIPPOCRATES *Sect. 4. aphor. 59.*

❧ ❧ ❧

Ætas juvenilis & virilis. III. Temperamentum sanguineum, cholericum.

§. XI.

Causas, viscidam hanc & acrem materiam generantes, per-versus sex rerum non naturalium usus suppeditat. I. Aër di-urnus calidior, & nocturnus frigidior. Illo enim humores in orgasum cientur, fluidiores eorum partes dissipantur, crassio-res in corpore relinquuntur. Hoc cutis pori constringuntur, salutaris transpiratio supprimitur, impuritates in corpore remanent. Idem effectus est coeli pluviosi vel humidì. Unde ratio patet, cur hæ febres vere & auctumno adeo familiares sint. II. Cibi crudi, viscidi, digestu difficiles, vel cum nausea ad-sumti. Potus aquosus viscidus, frigidus, spirituosus. III. Som-nus justo diutius protractus. IV. Vita sedentaria. V. San-guinis excretiones naturales suppressæ, & artificiales neglectæ. VI. Nimia tristitia & iracundia, sub pastum, vel post eum accedens.

§. XII.

Quæ de *causis* hæctenus diximus, & *morbi nostri genesin & symptomatum* rationem optime illustrant. *Occasionales cause* nimirum (II. IV. & VI. §. præced.) recensitæ naturali suo to-no ventriculum privant. Turbatur itaque digestionis negotium, generantur cruditates, chylus elaboratur viscidus, acrimonia contaminatus, qui ad sanguinem delatus, illum eodem inficit vitio. Vel sanguis quoque ex causis (I. III. & V.) dictis imme-diate tenax, spissus & acer redditur. Omnes inde humores, e sanguine secreti, saliva, liquor gastricus, utraque bilis, suc-cus pancreaticus, iisdem vitiis laborant, cibi non amplius rite concoquuntur, chylus depravatus, ad sanguinem delatus, hu-jus spissitudinem & acredinem magis magisque adauget, ægre hinc per vasa minima circuit.

B

culum



culum debilitatum & cruditatibus oneratum, laudabilis succi nutriti inopiam, impeditum sanguinis circulum, & spasmos, appetitus prostratio, corporis lassitudo, capitis dorsique dolores, tertianæ præcursores, excipiunt?

§. XIII.

Quodsi homo, hisce præmonitus, morbi principio convenientibus remediis non obstat, sed novos potius committit errores diæteticos, sanguis, majorem adhuc inde tenacitatem induens, in ultimis tandem subsistit arteriarum finibus, illosque obstruit. Ita cor sanguinem in arterias libere propellere nequit. Imminuitur inde motus humorum, tum intestinus, tum progressivus: unde frigoris sensus oritur. Turbatus æqualis fluidi nervei per nervos motus pandiculationes & oscitationes parit. Sanguis præterea, in ultimis arteriarum finibus stagnans, acredine sua universalem in systemate nervoso & vasculoso excitat spasmus. Universa hinc constringitur cutis, sanguis interiora versus repellitur, vasa detumescunt, & disparescent, facies hinc, labia & ungues pallent, mox autem ob sanguinem, in venis quoque subsistentem, livescunt. Similibus spasms, à materia acri, in primis viis stabulante, ortis, dolor ille gravativus atque tensivus, circa primam dorsalem vertebra perque dorsi longitudinem ad epigastrium adscendens, suam debet originem. Humoribus sic magis magisque imminuto, necessarium est, ut augeatur frigus, fortius constringantur solida, expellantur liquida, adeoque oriatur rigor. Inordinatus fluidi nervei arteriosique sanguinis in musculos influxus sub frigore fortiter corpus concutit. Quum nimia venosi sanguinis quantitas, venis frigore extremorum contractis, interiora anterioremque cordis ventriculum versus repellatur, hoc ad frequentiores inde irritatur contractiones: unde pulsus iusto celerior. Quum vero non tantum arteriarum aortæ & pulmonalis fines obstructi cordis evacuationi obicem ponant, sed

&



& fluidi nervei sanguinisque arteriosi in cordis musculos influxus simul langueat, debilius sese contrahit cor, neque integre sese evacuare potest: unde debilis & parvus pulsus. Eadem ex ratione non in qualibet diastole sinister cordis ventriculus sufficientem ad absolvendam systolen accipit sanguinis quantitatem. Palpitat ideo tantum, & nulla tam diu percipitur diastole in arteriis, quoad, ventriculo sufficienter repleto, hic validissime sese contraxerit, sanguinemque magna vi in aortam propulerit, eandemque dilataverit. Oritur exinde pulsus intermittens. Ob impeditum porro sanguinis in venam pulmonalem cordisque sinistrum ventriculum transitum, cruor in pulmonibus accumulatur, pulmonalis arteriæ ramificationes nimium distenduntur, pulmonales vesiculæ comprimuntur, ab aëre hinc sufficienter expandi nequeunt, respiratio fit difficilis, & summa anxietas oritur. Os, fauces exsiccantur, oritur sitis, quam humorum acredo, & saburra, biliosa præsertim, in primis viis stabulans, magis adhuc adauget. Eadem hæc saburra, vel acrimonia sua, vel quantitate, ventriculum irritans & vellicans, leviolem primo convulsionem, sicque nauseam & vomendi conatum, incremente autem irritatione, musculisque abdominalibus & diaphragmate in consensum simul tractis, actualem producit vomitum. Tubuli renales æque, ac reliquum systema vasculosum, spasmodice contractum, fluidissimis tantum seri particulis transitum concedit: unde urina pellucida & limpida existit.

§. XIV.

Eadem vero causæ, à quibus febrile frigus produci (§. præced.) diximus, etiam calori febrili ansam præbent. Obstructis enim arteriarum extremitatibus, sanguis fluxilis adhuc per laterales ramos celerius movetur, adeoque citius per venas ad dextrum cordis ventriculum redit, eumque ad frequentiolem excitulat systolen. Simul vero frigore contractæ, hincque robustiores factæ arteriæ, vimagna in contentum reagunt fluidum.



dum. Magnus inde oritur partium sanguinis constitutarum, tam inter se, quam ad vasorum latera, attritus. Augetur itaque & progressivus & intestinus humorum motus, huiusque effectus calor. Aucto humorum motu, accedente sufficiente potu, tenax sanguis mirum in modum conquassatur, dividitur, resolvitur, & singulis cordis ictibus, tanquam totidem cuneis, in sanguinem, ultimis arteriis inhaerentem, impingit, eumque pededentim etiam diluit, dividit, resolvit. Ita tollitur obstructio, redit per universum corpus calor, vasa antea collapsa, restituto nunc sanguinis circulo, denuo replentur, tument. Remota resistentia, cor magna vi atque celeritate sese contrahit; minima vasa, ne subcutaneis quidem exceptis, sanguine replentur; augetur hoc pacto calor, qui, quoniam humores nondum ita resoluti, vasaque cutanea eo usque relaxata sunt, ut sub sudoris forma illi erumpere queant, siccus est; pulsus micat plenior, fortior, celerior, frequentior. Sanguis, quum in cerebri vasis admodum exiguum inveniatur resistentiam, maiore quantitate ad caput ruit: unde vasa nimium quantum distenduntur, & pungens oritur cephalalgia; quæ singulis arteriarum ictibus augetur; oculi fiunt turgidi, rubicundi, fulgidi; internorum sensuum officina turbatur, ægroti aliena loquuntur. Sanguis, maiore velocitate per pulmones trajectus, citatiorem deposcit respirationem. Humores nondum satis resoluti, & calor, magnam in ore faucibusque producant siccitatem: unde intensa ægrum excruciat sitis. Aucto sub calore insigniter humorum attritu, tam inter se, quam ad vasa, salinæ, oleosæ, terrestres sanguinis partes magis magisque evolvuntur, perque renales tubulos, nunc, quam in priori stadio, latiores transcolantur: unde urina flammea, rubicunda, saturata.

§. XV.

Restituto igitur, auctoque sub calore libero humorum per omnis generis vasa circulo, & ingesto ob vehementem, quæ ægrotos & in frigore & in calore divexat, sitim copioso potu aquoso,

aquoso, spissus ac tenax diluitur sanguis, magis magisque dividitur, fluxilis redditur, materiaque peccans ad exitum disponitur. Sublatis itaque spasmis, & subacta materia peccante, omnia symptomata imminuuntur, pulsus evadit mollior, cutis lecti calore fovetur, laxatur, madescit. Unde vascula exhalantia sensim magis ac magis relaxantur, donec aquosæ sanguinis parti exitum concedant, quæ sub sudoris specie erumpit: quo finito, æger ad se redit, remanente tantum corporis lassitudine, atque appetitus prostratione. Urina, quam ægroti, superato paroxysmo, mingunt, saturatior & rubicundior, quam in secundo stadio est, postque statum deponit sedimentum roseum, biliosumve, quoniam tubulis renalibus, à spasmo perfecte liberis, & magis etiam, quam in priori stadio relaxatis, insignis materiæ peccantis, nuncque coctæ quantitas per hæc vias è corpore eliminatur.

§. XVI.

Si (§. 6. 8.) dicta cum *tertianæ continuæ* schemate conferantur, facile erit, hanc ab *intermittente* distinguere. In *continua* æque, ac *intermittente*. novus alternis diebus insurgit paroxysmus, qui vero & trium stadiorum, & symptomatum ratione, multum ab intermittentis paroxysmo discrepat. Invadit nimirum itidem, intermittentis instar, cum horrore & frigore, quod vero nec tam diu durat, & in paroxysmis sequentibus gradatim ita immittitur, ut vix amplius sentiatur. Siccus ille, qui horrorem excipit, calor est vehementior, longius protrahitur, enormem conjunctam habet cephalalgiam, deliria, sitim inexplebilem. Sensim tamen, erumpente sudore largiori, iterum quidem mitescit, at nunquam tamen plenarie intermittit: nam & intercalari die pulsus justo celerior micat, majoremque appetitus & virium prostrationem comitem habet. Somnus nunquam placidus, semper interruptus est. Verbo: *continuæ* paroxysmi longius extenduntur, nulla adest apyrexia, omnia denique symptomata, ipsi cum *intermittente* communia, si unum horrorem eximium feceris, sunt graviora.



§. XVII.

Febris tertiana intermittens ratione *durationis*, *decurfus* & *invasionis*, *circuitus*, *temporis anni*, *typi*, *locorum* & *subjectorum*, *indolis*, varie dividi solet. Ratione *durationis* est vel 1.) *iusta dimensionis*, vel 2.) *extensa*. *Iusta dimensionis* ea dicitur, quæ ultra duodecim horas paroxysmum non extendit. *Extensa* est, quæ longius suos extendit paroxysmos, & ad continuam magis accedit.

§. XVIII.

Ratione *decurfus* & *invasionis* dividitur 1.) in *regularem* 2.) in *anomalam*. *Regularis* vocatur, quæ legitimum servat typum, seu, cujus paroxysmi ratione *invasionis* & *durationis* sibi inuicem respondent. *Anomala* dicitur, quæ à legitimo typo recedit, seu, cujus paroxysmi certum accessionis tempus non observant, sed nunc mane, nunc circa meridiem, nunc vespere, nunc circa mediam noctem, accedunt; breviores modo, modo longiores existunt.

§. XIX.

Circuitus respectu est vel 1.) *exquisita*, vel 2.) *minus exquisita*. *Exquisita* est, quam septem paroxysmi finiunt (g). *Minus exquisita* est, quæ pluribus, quam septem, finitur paroxysmis.

§. XX.

Ratione *temporis anni* est 1.) *vernalis* l. *æstiva*, 2.) *autumnalis* l. *hiemalis*. *Vernalis* l. *æstiva* adpellatur, quæ à Februario ad Sextilem grassatur. Hæc mitioribus plerumque stipatur symptomatibus, sponte, aut cito curatur, minusque alit periculi. *Autumnalis* l. *hiemalis* à Sextili ad Februarium sævit, graviora importat symptomata, nec raro in fonticos degenerat morbos, aut prorsus funesta sit, saltem longior, atque contumacior existit.

§. XXI.

(g) De hac conferri meretur peculiaris MELCHIORIS SEBIZII dissertatio, Argentorati 1627. habita,

§. XXI.

Typi intuitu dividitur in 1.) *simplicem*, 2.) *duplicem*, 3.) *triplicem*. *Simplex* est, cujus paroxysmi alternis diebus recur-
runt, interjecto die intercalari. *Duplex* quotidie quidem ac-
cedit, sed paroxysmi, & invasionis, & vehementiæ, & dura-
tionis respectu, sibi alternatim respondent. Etenim tertius,
qui vehementior est, & ante meridiem plerumque accedit,
cum primo; quartus autem, qui mitior est, & post meridiem
accedit, cum secundo convenit. Facile ergo à quotidiana in-
termittente distinguitur, utpote cujus paroxysmi, sive vehe-
mentiam, sive accessionem spectes, æquales sunt. *Triplex* au-
dit, si primo quidem & tertio die simplicis paroxysmi loco,
binæ distinctæ exacerbationes, proxime sese mutuo excipien-
tes, intercalari autem unus duntaxat insultus observatur. Dif-
fert ab hac *hemitritæa*, sive *semitertiana*, tametsi vulgo pro sy-
nonymis haberi soleant.

§. XXII.

Ratione *locorum* & *subjectorum* est 1.) *epidemia*, 2.) *endemia*,
3.) *sporadica*. *Epidemia* ex communi quadam causa, v. gr. ex
insolita aëris constitutione, plures, eodem in loco degentes,
eodem tempore simul corripit. *Endemia* est, quæ plures, eun-
dem locum incolentes, ex causa quadam huic propria infestat.
Sporadica ex peculiari quadam causa, post commissum v. gr.
errorem diæteticum, hunc illum solitarie adgreditur.

§. XXIII.

Ratione *indolis* est vel 1.) *benigna*, vel 2.) *maligna*. *Be-
nigna* audit, quæ consuetis iisdemque mitioribus stipata est sym-
ptomatis, & vel sponte sua cessat, vel adhibitis congruis me-
dicaminibus facile cedit, nec unquam, nisi per enormiorem
quemdam, aut ægrotantis, aut medentis errorem, morte ter-
minatur. *Maligna* vocatur, quam extraordinaria, eademque
graviora comitantur symptomata, quæque, nisi cito conveniens
ipfi



ipsi occurrat medela, ægrum certissime jugulat. Pertinent huc quam plurimæ febres tertianæ intermittentes, epidemice grassantes, nominatim illæ, quibus, malo ægrotantium omine, sopor, vel insultus apoplecticus, tanquam symptoma, sese adsociat.

§. XXIV.

Febris tertiana intermittens, in florentis ætatis homines incidens, & legitime decurrens, plerumque, si rite tractetur, periculo caret, quin immo nonnunquam ipsa medicina est (b). Sin autem adhibitis, ante sufficientem materiæ peccantis correctionem & evacuationem, medicamentis adstringentibus sinistre tractetur, vel æger sub ipsius decursu insignes in diætâ committat errores, facile in continuam, aut cholericam, vel certe in febrem lentam, & malum hypochondriacum transire, vel œdematosos pedum tumores & hydropem generare potest. Sed majus hoc periculum, immo præsens vitæ discrimen, minatur *tertiana intermittens soporosa*, de qua fusiùs acturi nunc sumus.

§. XXV.

Est vero *febris tertiana soporosa* intermittentium malignarum species, quæ alternis diebus ægrotos, superato tertio quartove paroxysmo, nunc citius, nunc serius (i), loco horroris & rigoris (k), cum profundissimo sopore, per totum paroxysmum durante, invadit.

§. XXVI

(b) Vid. NICOLAI le ROY de SAINT-AIGNAN & FRANCISCI BERNARD quæstio medica quodlibetaria: *An febris sæpius morbi remedium, quam morbus?* Paris. 1743, cujus §. 4. plura, ex HIPPOCRATE præsertim, hanc in rem laudantur exempla.

(i) WERLHOFIUS *Obs. de febr. sect. I. §. V. p. 17. sq. & VI. p. 22.*

(k) SYDENHAM *epist. respons. I. p. 386. sq.*

§. XXVI.

Fallax admodum periculique plenissima est hæc febris, & tum ægrotum, tum Medicum, à prudentia clinica non satis instructum, facillime decipit. Tam enim egregie tertianam intermittentem, primis præsertim paroxysmis, mentitur, ut vix ac ne vix quidem ab ea distingui possit. Neque tamen, quæ anguem sub herba latentem prodant, plane desunt signa, id quod ex sequentibus liquido patebit. Multo ante, quam ipse morbus ingruat, nonnulli de lateris dextri dolore, per intervalla excruciante, conqueruntur. Febris ipsa ægrotos cum pandiculatione, oscitatione, ceterisque tertianæ intermittentis benignæ propriis, & (§. 6. seqq.) descriptis symptomatibus invadit: sed in primo, vel secundo paroxysmo, nec nunquam tardius, prouti sopor vel citius, vel serius, morbo supervenit, dictis symptomatibus somnus naturali profundior sese associat, qui ægroto quidem adstantibusque amicis, febris incommoda blando hoc somno falli sibi persuadentibus, neutiquam vero prudentiori, & rerum suarum satagenti Medico imponit. Finito paroxysmo, quidam orthostadii fiunt, sanisque simillimi videntur. Alii vero de insolita capitis stupiditate queruntur. Urina quorundam crassa, & quadam quasi pinguedine obducta est, admodum foetet, & colorem subfuscum, lixivii instar, immo nigricantem, præ se fert: quæ vero cum dysuria, aut stranguria, & frequentiori stimulo prodit, naturali interdum similis est. Pulsus in plerisque frequens, in multis durus & intermittens, dieque intercalari in nonnullis naturalis observatur. Sanguis, è vena eductus, plerumque floridus, satis æquabilis est, & copiosissimo, eique viridescenti innatat sero: interdum variegatus est. Nonnunquam superior feri pars in quandam quasi gelatinam coalescit, inferiore manente fluida, cumque intermixtis sanguinis grumis

C

patel-



patellæ adhærente. Interdum crustam offert inflammatoriam. Interdum verminosus & corruptus, vermiculos, cucurbitæ semini æmulos, progignit. Plures secundo, vel tertio paroxysmo, alii serius, gravi affliguntur cardialgia, qualis in ictericis & hepatitide laborantibus observari solet. Paroxysmo proxime insequente, profundior iste somnus in quam plurimis cum solitis febris symptomatibus revertitur, & cum paroxysmi incremento sensim increfcit: quosdam vero statim, horroris & rigoris loco, profundissimus adgreditur. Perit tunc omnis sensus atque motus, sola respiratio, quæ ore hiant, singultim, & cum stertore perficitur, vitam in ægris adhuc superstitem prodit. Nulla arte excitari possunt, & , quamvis post institutam venæ sectionem, vel scarificationem, adhibitosque pulveres sternutatorios, clysteres acriores, & cauteriorum applicationem, oculos aperiant, mox tamen rursus eos claudunt, vel etiam apertos, sine visione tamen, servant. Quosdam primus statim, vel secundus paroxysmus è medio tollit; alii, superato paroxysmo, ad se quidem redeunt, sed pejus habent, quam ante illum: continue febricitant, convulsivis agitantur motibus, in hemiplegiam, vel etiam catalepsin incurrunt, donec tandem, recurrente novo paroxysmo, sopore in apoplexiam mutato, vel sub ipso paroxysmo, vel præterlapsis aliquot diebus, vitam cum morte commutent (1).

§. XXVII.

Ut vero fonticum nostrum affectum eo clarius perspicere queamus, haud alienum erit, si de *symptomate*, inopinato eidem superveniente, ægrisque certissimum vitæ periculum minante, paullo agamus copiosius. *Sopor*is speciem esse (§. 24.) innuimus. Est vero *sopor* inexpugnabilis, atque præternaturalis

(1) WERLHOFIUS l. c. §. V. seqq.



lis somnus, modo cum febre, modo sine illa, ab impedito sufficienti fluidi nervei in medullam oblongatam, nervosque, sensibus & motibus dicatos, influxu originem ducens.

§. XXVIII.

Quatuor hujus soporis species dantur, coma, lethargus, carus, sopor apoplecticus, quæ tum indole & genio causæ efficientis, tum symptomatum intensiōe, inter se differunt.

§. XXIX.

Coma in vigil & somnolentum dividitur. Coma vigil, *κῶμα ἀγρυπνώδες*, continua, sed irrita in somnum proclivitas est, & etiamsi ægri obdormiscant, mox tamen sine ullo, vel certe cum exiguo admodum levamine, expergiscuntur. A meningibus cerebri inflammatis ortum ducit, & morbis acutis inflammatoriis, nec raro etiam hemiplegiæ (m), tanquam symptoma, jungitur. Coma somnolentum, *κῶμα ὑπνώδες*, assidua somnolentia, sive potius involuntarius, profundus, atque diuturnus somnus est, ex quo ægri quidem excitari possunt, sed brevi in eundem relabuntur. Vasorum cerebri sanguiferorum nimie relaxationi, difficiliore sanguinis spissi & impuri per caput transitui, nimie feri in cerebro collectioni originem debet. HOFFMANNUM (n) si audias, idiopathicum est, & febre caret; BOERHAAVIUS vero (o), NENTERUS (p) & LUNCKERUS (q) febrium symptoma esse contendunt.

C 2

§. XXX.

(m) FRID. HOFFMANNUS *Consult. Med.* Tom. I. Sect. I. Cas. XX. p. 91.

(n) *Med. rat. system.* Tom. IV. Part. IV. Cap. II. p. 53.

(o) *Aphor. de cognosc. & curand. morb.* §. 703.

(p) *Fund. med.* T. II. p. 420.

(q) *Consp. med.* p. 913.



§. XXX.

Lethargus est gravis assiduusque sopor, quo ægri perpetuo, sine ullo fere vigiliarum intervallo, obruuntur. Excitati quidem ad quæstiones respondent, mox vero in pristinum soporem relabuntur. Stupenda præterea hunc affectum comitatur rerum oblivio, ita, ut ægri oscitantes os claudere obliviscantur. Seri tenuioris per arteriarum poros transudationem & extravasationem, at minorem, quam in serosa apoplexia, pro causa agnoscit. Idiopathicus morbus est, & lentam febrem habet conjunctam.

§. XXXI.

Carus profundissimus sopor est, cum motus & omnis fere sensus abolitione, ex quo ægroti neque per clamores, neque per agitationes, neque, si vel acu pungantur, excitari possunt, & quamvis punctiones sentire videantur, nihil tamen loquuntur, & dormire pergunt, respiratione interim satis libera, & adhuc fere naturali, à nimia sanguinis copia, qua cerebri vasa adeo expanduntur, ut non solum medullarem substantiam comprimant, sed etiam liquidi nervei introitum in illam per totum caput impedian, proficiscens. Vel *idiopathicus* est, sæpiusque febre (r) stipatur, vel *symptomaticus*, febribusque, & acutis, & intermittentibus, & chronicis (s), tanquam symptoma, supervenit.

§. XXXII.

Sopor apoplecticus plenaria sensuum motuumque voluntariorum abolitio est, pulsu plerumque forti, & respiratione difficili,

(r) HOFFMANNUS l. c.

(s) LOMMIUS *observ. medic.* Lib. II. p. 75. LANCISIUS *de noxiis paludum effluviis.* Lib. II, Epidem. I. Cap. V.

cili, stertente, ab effusione vel sanguinis, vel feri, in cerebro ortum ducens. Morbus plerumque idiopathicus est, & sine febre occurrit; interdum tamen febrium tertianarum intermittentium (t) symptoma est.

§. XXXIII.

Qua ratione *soporosi affectus* inter se differant, ex iis, quæ hæcenus diximus, satis intelligitur. Superest, ut etiam indicemus, quomodo ab aliis analogis morbis distinguantur. Prodeat ergo primo *catalepsis*. In hac, uti in affectibus soporosis, durante paroxysmo, sensus & motus voluntarii suspenduntur. Differt autem ab iis 1) quod in illa ægroti in eo situ, in quo paroxysmus eos opprimit, immoti atque rigidi maneant, ita tamen, ut ab aliis moveri queant. Impulsi enim progrediuntur, & rigiditas non impedit, quo minus quoscunque illorum artus flectas, quos vero in eo situ immotos postea tenent. 2) Quicquid catalepticorum ori intruditur, illud devorant. 3) Pulsus naturali similis, & respiratio salva & integra est. 4) Convulsivi sæpius motus in abdomine costisque inferioribus (u) observantur. Denique 5) nulla arte, fortissimis licet salibus volatilibus, frictionibus atque punctionibus adhibitis (x) excitari possunt. Secundus morbus, qui cum soporosis adfectibus facile confundi posset, est *syncope*. Omnis in hac & sensus & motus subito perit: at simul etiam pulsus & respiratio intercipiuntur, facies cum gelido sudore foede pallet. In illis è contrario pulsus magnus & validus, & color faciei floridus est. Denique soporosi affectus etiam à *suffocatione uterina* discrepant.

C 3

In

(t) SYDENHAM l. c.

(u) HOFFMANNUS l. c. Tom. IV. Part. III. Cap. IV. p. 132.

(x) ID, l. c. observ. I. p. 148, & obl. II. p. 150.

In hac fauces vinculo quasi constringuntur, ut ægrotantes aliquandiu plane non respirent: in illis autem respiratio plane non supprimitur, tametsi in quibusdam speciebus difficulter peragatur.

XXXIII.

Ea, quæ de soporosis adfectibus in medium hæctenus protulimus, ad quam potissimum soporis speciem symptoma illud, febribus tertianis intermittentibus sub tertio, vel quarto paroxysmo, vel etiam serius superveniens, referendum sit, liquidissime declarant. Quoniam nimirum omnis sensus & motus perit, ægri nulla arte excitari possunt, adhibitis fortissimis stimulantibus; oculos quidem aperiunt, & ita sentire videntur, mox vero illos iterum claudunt, vel etiam apertos, sine visionis tamen sensu, servant, & dormire pergunt: *symptoma* hoc jure meritoque ad *carum* referimus (γ). Quum vero respiratio non satis sit libera, nec ad naturalem propius accedat, sed ore hiant, singultim, cumque stertore perficiatur, & præterea quidam ægroti, superato paroxysmo, hæmiplectici fiant, immo cuncti, ex hoc morbo decedentes, ex apoplexia moriantur, *carum* hunc ad *apoplexiam* quam proxime accedere patet,

(γ) *Carum* febrium exacerbationibus aliquando supervenire, jam dudum notavit antiquus rerum medicarum scriptor, PAULLUS AEGINETA *Lib. III. Cap. IX. p. 114. edit. Basil. 1532. fol. conf.* RUDOLPHI IACOBI CAMERARII *diff. de apoplexia cum febre. Tubing. 1717.* Ceterum de febribus tertianis intermittentibus, quibus adfectus soporosi supervenerunt, conferri præter alios merentur CAROLI RAYGERI *obs. de febre tertiana intermittente comatosa. Ephem. Germ. Dec. III. Ann. III. obs. CXXXVIII.* MATTHÆI BLAUII *obs. de febre tertiana intermittente maligna, in laud. Ephem. Dec. cit. Ann. VII. obs. LVIII.*

patet, unde haud incongrue *soporis apoplectici* nomine ipsum designasse nobis videmur.

§. XXXV.

Experientia docet, febrem nostram frequentissime, vel ex noxia aëris constitutione, aliisque causis communibus, plures homines, in uno eodemque loco degentes, eodem tempore, simul aggredi, vel certis locis propriam esse, vel hunc illumve, senes præcipue, ex peculiari quadam causa corripere. In epidemicam (z) igitur, endemiam (a), & sporadicam (b) eandem dividimus.

§. XXXVI.

Cum morbus noster præsens intentet vitæ periculum, de *signis* ejus *anamnesticis* potius, quam de *diagnosticis*, solliciti esse debemus. Facilius enim futurus avertitur morbus, quam præsens tollitur. Dari vero certa quædam *signa*, ex quibus carum febri

(z) Hanc observarunt LANCISIUS, SYDENHAMUS, WERLHOFFIUS, alii.

(n) EUGALENUS hanc febrem propter humidum & crassum aërem aquasque salvas & putridas Emdæ endemiam observavit. Vid. ejus *Tract. de scorbuto. p. 202.*

(b) Ad hanc speciem referri potest casus, quem FRID. HOFFMANNUS l. c. Tom. IIII. P. IIII. cap. II. Obs. I. p. 68. describit. Febres tertianæ quidem epidemice grassabantur, cum quinquagenarius iste, cujus in hac observatione mentio fit, tertiana duplici soporosa corriperetur: sed ex peculiari corporis sui constitutione, nimia scilicet capitis à prægressis mærore, vigiliis, vinique absinthiaci abusu, debilitate id factum esse, ex morbi historia patet.



febri nostræ supervenientem colligere liceat, historia ejus (§. 26.) tradita docet. Sunt autem, quæ sequuntur. I. Febris tertiana intermittens, epidemice grassans. II. Dextri lateris dolor, per intervalla recurrens, multo ante, quam morbus ipse sese manifestet. III. Somnus naturali profundior, morbo sese associans. IV. Insolitus capitis stupor, intercalari die ægrotos affligens. V. Gravis cardialgia, qualis in ictericis & hepatitide laborantibus observatur, morbo superveniens. VI. Urina crassa, subfusca, pinguedine quasi obducta; vel etiam naturalis, at cum frequenti micturitione, dysuria aut stranguria emissa. VII. Sanguis floridus, sero copiosissimo viridescenti innatans. Sanguis, cujus serum superius in gelatinam concrevit, inferius autem fluidum, & sanguinis grumulis intermixtum est. Sanguis crustam inflammatoriam exhibens. Sanguis verminosus.

§. XXXVII.

Devolvimur nunc ad *causas* nostræ febris, in quibus erendis primario ad *soporem* heic respicimus, quum febris tertianæ intermittentis causas supra jam (§. 11.) tradiderimus. Efficit igitur *soporem*, quicquid liberum fluidi nervei fluxum & refluxum in organa, tum sensoria, tum motoria, impedit. Impeditus autem hic influxus alias, tam *propiores*, quam *remotiores*, supponit *causas*. *Propiores* heic loci tres fere sunt vel 1.) nimia fluidi nervei penuria, vel 2.) tubulorum nerveorum relaxatio, vel 3.) cerebri compressio, quæ vel à sanguine, tardius per cerebri hujusque membranarum vasa circulante, aut plane stagnante, unde vasa nimium distenduntur, vel à quacunque materia peregrina, cerebro incumbente, vel peculiari aliquo miasmate narcotico, ab extra in corpus se insinuante, dependet.

§. XXXVIII

§. XXXVIII.

Inter *remotiores causas* harumque conditiones referendæ sunt, præter sanguinis spissitudinem & acredinem (§. 10.) 1) ætas senilis, in qua solida quidem, nimis rigida, non rite amplius fluida circumagunt, hæc autem justo spissiora difficilius per cerebri vasa circulant. 2) Temperamentum sanguineo-phlegmaticum, in quo spissiora & lentescunt fluida non tantum solida exsuperant, sed & sanguinem, ob imminutum motum progressivum & intestinum, inspissant. 3) Crassus & obesus corporis habitus, fluidorum abundantiam & solidorum laxitatem conjunctam habens. 4) Viscerum imi ventris obstructions (c), quibus liber humorum in abdomine circulus valde impeditur, &, febre superveniente, sanguis facile versus caput rapitur. 5) Vermes in ventriculo & intestinis (d) hospitantes, qui, tunicas horum viscerum rodendo, spasmos in iis excitant, unde eadem oriuntur symptomata.

§. XXXIX.

Ad *causas præcogumenas*, præter eas, quas (§. 11.) in medium attulimus, sequentes adhuc spectant. 1) Tempestas diu pluviosa atque austrina, unde flumina exundant, quorum aquæ postea in humilioribus locis & vallibus stagnant, & vitium capiunt: succedente vero calidiore tempestate, hæ aquæ putridos per solis vim vapores, aërem inquinantes, exhalant, qui, cum cibis & potu deglutiti, corporis nostri humores eadem prava inficiunt qualitate (e). 2) Habitatio non procul a paludosis locis, vel etiam in humido cubiculo, ubi aër densus & vapidus esse solet. 3) Purgatio sine indicatione in febrium intermittentium epidemiarum initio instituta. 4) Remediorum, aut potulentorum spirituosorum, & sulfureorum usus, quæ bilem crassiorem agitare, & ad cerebrum rapere possunt. 5) Nimia febris vehementia, in primis, si in subje-

D

ctum

(c) LANCISIUS l. c. §. 3. p. 158.

(d) IDEM l. c. §. 4. pag. 159.

(e) IDEM l. c. p. 150. seqq.



Etum incidat, quod diætetica vitia (§. 11.) recensita commisit, vel causis (§. præced.) enumeratis obnoxium est, vel cui scabies, aut ulcera, perperam sanata fuerunt (f).

§. XL.

Expositis *febris nostræ soporose causis*, facile rationem reddere possumus, quomodo *carus*, vel *sopor apoplecticus*, febri tertianæ intermittenti, tanquam symptoma, supervenire possit. Febrem duplici potissimum humorum motu, uno a corporis peripheria ad centrum, altero ab hoc ad illam absolvi, ex §. 13. seq. constat. Prior minus salutaris, sed naturæ plane contrarius, immo letalis sæpius est. Quicunque enim ex febre tertiana intermittente moriuntur, durante hoc morbi stadio, ad patres abeunt. Posterior vero corpori amicus, & medicinæ loco est. Hoc enim noxia atque peccans materia ad exitum præparatur, præparataque eliminatur. Si quis igitur ex causis (§. 37. seqq.) commemoratis febre tertiana intermittente corripitur, humores, sub frigore interiora versus retropulsi, ob circulum sanguinis, in dictis partibus, vel a spasmis, vel a viscerum obstructionibus, præpeditum, ad alia loca minus resistantia, hoc est, ad caput, ruunt. Quoniam vero ob lentorem suum per debilitata encephali vasa tardius moventur, in illis adcumulantur, ea distendunt, cerebrum comprimunt, fluidi nervei secretionem, influxumque in nervos impediunt, sicque primis paroxysmis somnus naturali profundior oritur. Sublatis finito paroxysmo spasmis, restitutoque libero humorum in externis partibus circulo, ii, quorum solidorum tonus non nimis debilitatus est, sanis similes videntur. In quibus autem secus res se habet, intercalari etiam die, de insolito capitis stupore conqueruntur. Cum vero nimia hacce distentione vasa magis magisque relaxentur, novo ingruente paroxysmo, & retropulsis iterum versus centrum fluidis, hæc maiore etiam, quam in præcedentibus paroxysmis, copia ad caput feruntur, vasaque adeo expandunt, ut fluidi

nervei

(f) WERLHOFFIUS l. c. p. 24. seqq.

nervei introitum ex corticali substantia in medullarem per totum impediunt caput, unde fieri non potest, quin carus subsequatur. Quorum autem vasa tanto adhuc gaudent robore, ut plenariæ quidem disruptioni resistere queant, at eo tamen usque distendantur, ut diapedesis accidat, in iis post seri per membranarum, ex quibus vasa conflantur, interstitia transfusionem apoplexia serosa, hemiplegiam creans, oritur, donec, revertente novo paroxysmo, vasa plane disrumpantur, & letalis sanguinis in cerebrum effusio contingat.

§. XLI.

Quæ de febre nostra *soporosa* hætenus in medium protulimus, prognosin haud adeo lætam promittunt. *Quæcunque enim febris soporem inducit, juxta HIPPOCRATEM (g), maligna est.* Sopor, morbo nostro tanquam symptoma superveniens, fluidi nervei influxum in nervos interceptum esse indigitat. Quoniam vero liber hujus liquidi fluxus & refluxus ad vitam absolute necessarius est, hanc, illo diutius sublato, salvam esse non posse, nemo non videt. Cum præterea sopor noster facile in apoplexiam transeat, hæc autem, si vehemens sit, plane non, si autem debilior, admodum difficulter solvi queat (h), jure meritoque atro morbum nostrum notamus carbone, eumque inter periculosissimos vitæque humanæ inimicissimos numeramus. Maximum conjunctum habent periculum *epidémica & endémica*, minus vero, si in subjectum non adeo senile incidat, *sporadica*. Denique notandum quoque est, febrem nostram recidivis quam maxime obnoxiam esse.

§. XLII.

Si ullo in morbo curando limato judicio practico opus est, certe in nostro id requiritur. Inconstans enim *soporosa febris*, & in primis *epidémice grassantis*, *indoles curam* admodum difficilem reddit, quum eadem medendi methodus, quæ in hac epidémica con-

D 2

stitu-

(g) *Opusc. Aphorist. prædict. I. 74. edit. Basl. 1748.*

(h) *HIPPOCR. S. II. aph. 42.*



stitutione morbi genio quam maxime accommodata erat, alio tempore eidem prorsus adversetur. Sic SYDENHAMUS (i) cujuscunque generis evacuationes, quamvis ad revellendos e cerebro humores nostra in febre indicari videantur, genio morbi contrarias, mortem accelerasse observavit. LANCISIUS (k) phlebotomiam simplices atque benignæ indolis febres tertianas intermittentes epidemicas in continuas & malignas mutasse affirmat. WERLHOFFIUS è contrario (l) & venæ sectiones, & lenia laxantia, & vomitoria, optatissimo cum successu in tali febre adhibuit. Ob diversam hancce febrium soporosarum indolem universaliorē, & quidem præcipue epidemicæ, medendi methodum indigitabimus, quibusque cautelis, & quo ordine diversis indicationibus satisfaciendum sit, quantum quidem tenues nostræ in praxi vires permittent, enodabimus.

§. XLIII.

Sequentes ergo formandæ sunt *indicationes*. I. Plethora est imminuenda. II. Peccans & in primis viis hærens materia evacuanda. III. Tenax, spissus, sanguis incidendus, diluendus, acredo cicuranda, obstructions reserandæ. IV. Febris fuganda. V. Recidiva præcavenda, & partes debilitatæ roborandæ. Est universalis hæc methodus, secundum quam febris nostra, rebus ægri satis adhuc integris, debellari debet, nisi peculiaris morbi genius, probe iccirco a Medico explorandus, hanc illamve ex prioribus indicationibus contra indicet. Quod si vero somnus naturali profundior jamjam feбри se associavit, periculumque in mora est, alia tunc via incedendum. In ipso scilicet paroxysmo ad sanguinem spissum diluendum, acremque cicurandum, infusa theiformia ex herbis betonicæ, veronicæ, capillorum veneris, cet. floribus verbasci, bellidis, tussilaginis, primulæ veris, cet. parata, iuscula ex carne vitulina, vel pullis confecta, cumque radicibus cichorei, scorzonæræ, herbis lactucæ, endiviæ, rasura cornu cervi, eboris, alterata, vel gelatinam cornu cerui, eboris, cochlea-

(i) l. c. p. 387.

(k) l. c. C. V. §. I. p. 158.

(l) l. c. Sect. III. §. II. pag. 72. & seqq.

cochleatim cum jusculis sumendam, præscribat. Sanguinis orgasmum & calorem remediis temperantibus, acidiusculis, aliisque, lapidibus cancrorum citratis, conchis citratis, cornu cervi philosophice præparato, succino præparato, nitro depurato, cum aquis destillatis C. B. scorzonera, florum tilia, cet. adjectis ad gratam aciditatem aliquot guttulis spiritus sulfuris, vel phlegmatis vitrioli, vel succo citri, in formam potiunculæ redactis, & sirubo quodam, v. gr. acetositatis citri, berberum, cet. edulcoratis, moderetur, & transpirationem promoveat. Cruribus porro, ad excitandum ægrum, vesicatoria, admirandum in morbo nostro (m) remediî genus, imponenda curet. Neque enim solum in fluida, spissa scilicet resolvendo, sed & in solida, nimis relaxata irritando, constringendo & roborando agunt cantharides, sicque motum humorum, tum progressivum, tum intestinum, promovendo, noxiam atque acrem materiam, partim per naturalia, partim per arte facta emissaria, expellunt.

§. XLIV.

Finito paroxysmo, quænam ex indicationibus maxime urgeat, probe perpendat Medicus, eamque intercalari hoc tempore adimpleat. Venæ sectionem ex plethorico ægri statu, sanguinis orgasmo, febris vehementia, insigni sanguinis caput versus congestione, suppressis aut neglectis sanguinis evacuationibus, naturalibus & artificialibus, & denique ex epidemicæ constitutionis genio, eandem exposcente, necessariam esse judicabit. An illa repetenda sit, nec ne, major, vel minor plethoræ & vehementiæ febris gradus; utrum in superioribus, an inferioribus corporis partibus, instituenda sit, sanguinis vel major, vel minor versus caput raptus, ut & naturalium evacuationum ratio declarabunt. Nausea, vomendî conatus, actualis saburræ viscidæ, biliosæ, acris, in primis viis hærentis, spasmosque excitantis, vomitus, vomitoria adhibenda esse demonstrant. Hunc in finem tartarus emeticus, vel radix ipecacuanhæ, in conveniente dosi in usum trahantur. Ponderis in abdomine sensus, flatus,

D 3

(m) LANCISIUS l. c. cap. VIII. p. 166. WERLHOF. l. c. p. 72



flatus, hypochondriorum tentio, nimia aui lubricitas, laxantium & enematum usum postulant. Laxantia sint lenissima, ex rad. rhabarb. mann. cass. tamarind. vel eorundem pulpa; ex salibus laxantibus, Sedlicensi, Angl. polychresto SEIGNETTE, cet. parata. Clysteres ex rad. herb. flor. & seminib. emollient. carminat. v. gr. rad. alth. malv. cet. herb. mercurial. parietar. cet. flor. verbasco. chamæmeli &c. sem. anis. fœnic. cet. adjectis oleo olivar. vel chamæmeli, & largiore nitri portione, conficiantur. Quodsi duæ hæ indicationes æquali pondere urgent, sanguis in ipso paroxysmo, & quidem in secundo ejus stadio, mitti, & finito paroxysmo, evacuans remedium porrigi posset. Cunctatorem enim, vel otiosum spectatorem agere vellet, si ullo in morbo, in nostro certe, valde periculosum est. Si neutra harum indicationum necessaria videatur, mox ad quartam adimplendam prudens descendet Medicus.

§. XLV.

Cum *carus* in febre nostra maximum minetur ægrotis periculum, originaria vero hujus causa febris (§. 40.) sit, patet, hanc primo quoque tempore curandam esse. Quæ enim alias obtinet febres intermittentes curandi methodus, hoc sane in casu locum non habet, quoniam centies ægrotus ante periret apoplexia, quam viscidi humores fluxiles satis redderentur, acres sufficienter temperarentur, viscerumque obstructions reserarentur. Neutiquam igitur inutilibus hisce moliminibus opportunum consumendum tempus, sed, urgente periculo, febrifuga, & quidem ante tertium, quartum certe diem (o), vel, antequam profundior somnus in carum transierit, adhibenda sunt. Inter omnia vero, hoc titulo superbientia remedia, *corticem peruvianum* reliquis omnibus palmam facile præripere, adeoque tuto & optimo cum successu in morbo hoc adhiberi, dummodo in sufficiente quantitate, & solus (o) intercalari tempore ægris porrigatur, cum experientissimis Practicis adfirmare nulli dubitamus. Finito ita-

(n) LANCISIUS l. c, Cap. VIII. Sect. II. §. I. p. 168.

(o) WERLHOF, l. c. Sect. IV. §. II. p. 89.

itaque paroxysmo, corticis peruv. subtilissime pulverisati drachma una, vel sola, vel, ad blandiendum ægrotorum palato, cum sirubo quodam v. gr. C. B. vel acetos. citri, cet. in bolum transformata, secunda quaque, vel tertia hora, ad novam usque accessionem exhibeatur. Vigente vero paroxysmo, corticis usum intermittere, remediaque, spissum sanguinem diluentia, acrem obtundentia, orgasmum & calorem temperantia, (§. 43.) laudata, propinare præstabit. Declinante paroxysmo, statim cortex repetendus, ejusque usus ad plenam usque paroxysmorum cessationem continuandus erit.

§. XLVI.

Fugata febre, superatoque periculo, tutius reliquis satisfieri indicationibus poterit. Commode hoc tempore & tuto materia peccans, nunc cocta, nodulo per epicrasin laxante, si in morbi principio id fieri ob contraindicationem non potuit, è corpore eliminatur. Idem de venæ sectione esto judicium. Continuato diluentium & demulcentium usu, spissus & acer sanguis fluxilis redditur, & obtunditur. Incidentibus & aperientibus viscerum obstructions referantur. Hunc in finem juscula medicata ex succo rad. cichor. gramin. asparag. &c. herb. intub. lactuc. cochlear. beccabung. acetos. cet. milliped. sal. Seignett. tart. solub. tart. vitriol. cet. confecta, vel elixiria aperientia ex liquore terr. fol. tart. aperit. mineral splenet. in quibus extr. amar. C. B. centaur. min. gentian. rhabarb. cet. solvuntur, aquæ Selteran. Syvalbac. Egran. ægrotis præscribi solent. Quoniam vero febris nostra recidivis admodum obnoxia est, ad hæc præcavendas febrifuga dictis remediis interponenda, & aliquamdiu adhuc continuanda sunt. Minime vero hæc indicatio adeo magnam singulisque bihoriis repetitam corticis dosin requirit. Sufficit scrupulum unum ad drachmam semis quarta quaque hora quotidie, tandemque bis per diem assumere. Commode quoque nunc, si quidem res id exigat, laxantibus, aperientibus & roborantibus maritari poterit. Tandem debilitatæ partes roborandæ quoque sunt. Obtinemus hunc scopum stomachicorum, quæ vocantur, remediorum usu, qualia sunt Tinct. Vitriol. Mart.



Mart. Lud. Ess. Cort. Aurant. C. B. elix. stomach. Hoffm. cet. quæ singulis diebus bis, ante prandium & coenam, ad 60-80. guttas per aliquod tempus sunt usurpanda.

§. XLVII.

Valet hæc quidem febrem nostram curandi methodus, si somnus tantum naturali profundior adest. Sin autem Medicus ægrum caro jam, vel sopore apoplectico oppressum invenit, eum apoplectici, sed simul etiam febricitantis instar, tractare debet. Omnem hoc in casu eo intendere debet nervum, ut ægrotum e profundissimo sopore excitet. Hunc in finem omnium primo de plethoræ imminutione sollicitus sit. Largiorem hoc fine in pede venæ sectionem instituendam curet, cui mox alteram in brachio collove subnectat (p). Aluum acriori clystere ex herb. betonic. verben. parietar. flor. chamæmel. paralys. roris marini, sem. anis. caru. follic. fennæ in s. q. aquæ fluviatilis cocto, additisque colaturæ pulp. cass. vel elect. cathol. vel. mell. mercur. ol. olivar. chamæmeli, cet. nitro ant. sal. gemm. cet. confecto reseret: cruribus, manuum carpis, nuchæ, ipsique capiti raso cucurbitulas cum scarificatione, hirudines, vesicatoria applicet. Naribus ad excitandos sensus salia urinosa volatilia, destillatis oleis cephalicis mixta, vel sub sicca vel liquida forma admoveat. Talia sunt spir. sal. ammon. cum calc. viv. paratus, sal. volat. C. C. sal ammon. siccum, ol. dest. rut. majoran. lavend. cet. Eundem in finem pedum plantas pannis asperis, aut excutiis fricari jubeat, vel ipsa cauteria actualia in usum vocet. Interius, si deglutiendi facultas supersit, ægrotis

(p) Sunt, qui *arteriotomen* omnibus reliquis sanguinem mittendi speciebus heic anteponunt. Ex professo id fecit CATHERWOODIVS in tractatu, anglice conscripto, cui titulus: *A new Method of curing the apoplexie*. Add. SILVESTRI ANTONII le MOINE & ANNÆ CAROLI LORRY Quæstio medico-chirurgica quodlibetaria: *An arteriotomia aliquando instituenda?* Paris. 1748. §. III. pag. 6. alique scriptores, quos laudat SAMUEL FRIDER. NOETTINGER in disp. de arteriotomia, ejus recto usu, & injusto neglectu. Arg. 1747. Cap. II. §. VI. pag. 25.



grotis haud sine fructu succus nasturtii aquatici, vel solus, vel cum spir. salin. volatilibus, acidis aut mediis (q), vel etiam mixtura ex aquis cephalicis flor. tilia, ceras. nigr. meliss. apoplect. LANGII, cet. & absorbentibus, antispasmodicis, diaphoreticis fixis, & cephalicis, lapid. scilicet 69 præp. conch. præp. succin. præp. specif. cephal. MICHA. cinnab. variis speciebus, nitr. ant. diaph. liq. C. C. succinat. anodyno mineral. HOFFMANN. sirubo flor. paralys. tunic. cort. aurant. cet. addito non nunquam ad excitandum fortiorum stimulum, tantillo tart. emetic. parata, propinentur. Excitato his ægro, mox, finito paroxysmo, ad corticem peruvianum confugiendum, isque methodo (§. 44.) indicata in usum vocandus est. Quodsi autem febris genius eas evacuationes, quarum ope humores è cerebro alias revelli solent, aversetur (r), hæc, vesicatoriis exceptis, omittendæ sunt, & expectandum, donec paroxysmus sponte cesset, quo tempore intercalari iterum peruvianum corticem ad perfectam usque reconvalescentiam in conveniente dosi usurpandum commendamus.

§. XLVIII.

De diætâ notandum est, ægrotis in paroxysmo non nisi juscula §. 43. laudata, extra eundem vero jura carniû, hordeum, oryzam, ova forbilia, & potus ordinarii loco ptisanam, ex rad. gram. scorzon. polypod. rasur. eboris, sem. anis. vel fœnic. confectam concedenda esse. Superato quolibet paroxysmo, ad plenariam sanationem usque linthea, febrili sudore inquinata, removenda, & cum mundis, iisque probe siccatis, sunt commutanda. Profligata febre, solidiores sensim cibi, digestu tamen faciles, nec non etiam pauxillum vini, convalescentibus concedi potest. Humidiorem & frigidiorẽ aërem cane pejus & angue fugiant, in aëre vero moderate calido, sicco & puriori, quum primum id vires permiserint, moderatum instituant motum.

§. XLIX.

Supereffet nunc de symptomatibus quoque, vel ex morbi nostri reliquiis, vel ex ægri idiosyncrasia, vel ex minus sufficienter dato, aut penitus omisso cortice Peruviano emergentibus, exponere. Verum, quum pleraque illorum ita sint comparata, ut continuato & repetito antifebrilium usui facile cedant, ceterorum vero, quæ alia expetunt remedia, specialiorẽ therapiam Cel. WERLHOFIUS tradiderit, veta hinc contrahimus, & dissertationi nostræ imponimus

E I N E M.

(q) WERLHOF. l. c. p. 81.

(r) SYDENHAM l. c.

E

PRÆ-



PRÆNOBILISSIMO DOCTISSIMOQVE

DN. A V C T O R I

S. P. D.

P R A E S E S.

Erunt fortasse, PRÆNOBILISSIME DN. CANDIDATE, quibus Specimen hoc TVVM academicum pudorem possit suffundere. Eos volo, qui vel Doctorum academicorum prælecta, vel dictata calamoque excepta, vel alia MSta exscribunt, exscriptaque, Speciminum academicorum loco, in publicum protrudunt. Isti de certo quodam nundinatorum genere esse mihi videntur, de eorum nempe, qui vestiariam exercent mercaturam. Trita enim detritaque toties in prælectionibus publicis, privatis & privatissimis, pro novis vendunt, quia pro suis. Invenient etiam facile, qui mercem ejusmodi emtam esse cupiant. Emunt, & sæpe viliori pretio emunt, emtamque iterum vendunt, non nunquam interpolatam, at nunquam tamen, aut raro sine invidiosa fraudis prodicione. Qui enim, quæso, fieri poterit, ut vestis, vel optime interpolata, apud alios antea frequentior usus plurimis sui spectatoribus non sit cognitus? Genuinum vix suppetit nomen, quo in Latio saluari possint sat apte, qui tritis antea Speciminibus, interpolatis nunc, licet de cetero phaleratis, cathedram inauguralem conscendere non verentur. GALLIS audiunt Fripiers, qui locutione inde desumpta: friper sa leçon, adposite idem prope innuunt, si hoc unum feceris eximium, quod non gaudeant jure προτιμωσις, nec habeant instrumentum auctoritatis publicum in hujusce modi emtionibus venditionibusque.

Ex

Ex illorum genere TE non esse, oppido constat. In doctrina, quam proponis, tam theoretica, quam practica, TE versatissimum esse, ex privato, quod mecum saepius instituisti, colloquio satis abundeque perspexi. Neque vero hoc solo nomine, sed & plurimis aliis bene merentem & bene meritum TE praestitisti Philiatrum. Litterarum indefessis studiis non tantum, sed morum etiam probitate, totam TVAM, quam inter nos peregisti, vitam academicam condecorasti. Iisdem rebus TE Exteris quoque commendasti, quod ipsorum testimonia, non emendicata, sed sponte TIBI oblata, confirmant. Ab illis in patriam redux, non illotis proinde manibus ipsam jam per aliquod tempus exercuisti, & feliciori quidem cum successu, praxin medicam. Dehinc ad nostra TE reversum subsellia, in utroque profectuum TVORVM examine talem invenimus, cui unanimes adplausu conferre possimus in arte salutari Lauream. Euge! conscende nunc cathedram inauguralem, ex ea, quod proprio elaborasti Marte, strenue defensusus. Consequere & hoc studiorum specimine, quibus TE dignum judicavimus, summos in Medicina honores, academicaque praxin medicam exercendi privilegia, quae hisce TIBI & TVAE familiae, futurisque TVIS agrotis ex animo gratulor, SUPREMVM SALVTIS NOSTRAE AVCTOREM piis devenerans precibus, ut SUA TE porro benedictione secundet quam benignissime.

Dabam e Museo d. XXX. Octobr. c1800CLVIII.



Quos capis, e toto TIBI pectore grator honores:
Jam meritam laurum nectit *Hygea* TIBI.

Posuit

DOERNER, Med. Cand. Opp.

Letiferum exponens *somnum*, cum febre tritæ
Junctum, TE studiis *invigilasse* probas.

Ita

Prænobilissimo DN. LICENTIATO,

Amico suo integerrimo,

adplaudit

JOH. FRIDERICVS CLOSSIVS,

Marbacensis.

Philos. D. & M. C. Opp.

Cum TIBI laus TVA sit, cum sit mea vena *febrilis*,
Unum dico *Vale*. Cetera pectus habet.

Gratulabundus apposuit.

C. E. HOFFMANN, *Tubing.*

Med. Stud. Opp.

Dum *febrim* egregie depictam sistis AMICE,

Egregie ut loculos impleat, opto, TVOS!

Vltiori favori Prænobiliss. DN. LICENTIATI
sefe commendaturus, ex sincero animi adfec-
ctu adposuit,

JOANNES JACOBVS MANNER,

Ulmensis, M. C. Opp.

Dum cathedram scandis, meritosque capeffis honores,
Ex animo exoptat prospera quæque TIBI

Frater germanus

JOH. CHRISTIANVS LVD. MOERICKE,

Seminarii Denckendorffensis

Alumnus. Opp.